

辭盡心料理以副予望○夜坤方有氣如火光○癸酉合司連啓仁城君事玉  
堂亦上劄 荅曰仁城於予外有君臣之義內有叔姪之親危疑之際倚若維  
城爾等不度予意張皇辭說以為搆陷之地殊極非矣宜勿更煩於是執義朴  
炆掌令鄭基廣李景憲持平金堉等啓曰使珙無一毫預知之跡而臣等所論  
實出於搆陷則他人無辜尚不可如此況於 先王之子乎 殿下若明知臣  
等果有搆陷無辜王子之罪則自有當施之律不當徒以此言威脅言官使不  
得盡言也臣等啓辭果有片言隻字故為搆陷之言乎君臣之間分義嚴截家  
人叔姪之誼非所當稱而 殿下前日之批乃以父子之分為教臣等竊恐因  
此尊卑易位名分倒置將至於國不為國 殿下安得為此亡國之言使朝野  
失望乎大抵近來君臣上下尚浮文而無實用崇小節而昧大體觸事生疑遲  
回前却有同兒戲兇徒傍觀而竊笑識者仰屋而長吁臣等見國事之日就委  
靡寧欲碎首丹墀之下不復見此等文象也臣等誠未格天每承嚴旨請命適  
忤 荅曰勿辭大司憲李晬光司諫李明漢亦以此引避而出復合司力請○  
甲戌弘文館應教李垓因至日上疏以陰陽消長世道治亂惓惓陳戒 上嘉  
納之○乙亥禮曹判書李廷龜以病辭職不許○禁府啓曰昨因鞫廳啓辭有